

28/01/2003

Suami isteri menang anugerah seni

KUALA LUMPUR: Pasangan suami isteri, Noor Azizan Rahman Paiman, 32 dan Suhaila Hashim, 29, memenangi Anugerah Perdana Bakat Muda Sezaman 2002 melalui karya mereka bertajuk 'On Air' yang mengetengahkan peranan media dalam masyarakat.

Pasangan pelukis itu menerima wang tunai RM10,000 dan geran perjalanan ke sebuah negara Asean bernilai RM4,000.

Hadiah disampaikan Presiden Majlis Aids Malaysia (MAM), Datin Paduka Marina Mahathir pada majlis pameran dan penyampaian Anugerah Bakat Muda Sezaman 2002 di Balai Seni Lukis Negara, semalam.

Hadir sama Ketua Pengarah Balai Seni Lukis Negara, Wairah Marzuki dan Ahli Lembaga Balai Seni Lukis Negara, Yong Ming Sang.

Anugerah itu diperkenalkan Balai Seni Lukis Negara pada 1974 bertujuan memberi ruang, pengiktirafan dan dorongan kepada pelukis muda supaya meneruskan usaha mengembangkan seni tampak tanah air.

Anugerah itu juga diperkenalkan bagi memupuk, mencungkil bakat dan membina masyarakat Malaysia.

Seramai 120 karya pelukis diterima untuk merebut anugerah itu, tetapi hanya 26 karya dipilih untuk dipamerkan.

Sementara itu, pemenang hadiah juri, Yap Sau Bin, Nur Hanim Mohd Khairuddin dan Abdul Mutalib Musa, menerima wang tunai RM5,000 dan geran perjalanan ke sebuah negara Asean bernilai RM4,000.

Hadiah penghargaan pula diterima Lau Mung Leng, Mokhzani Hairim Mokhtar, Muhd Fauzulyusri Mohd Yusof, Azliza Ayob dan Safrizal Shahrir. Mereka menerima wang tunai RM2,000 seorang.